

საქართველოს მთავრობის

დადგენილება №577

2018 წლის 27 ნოემბერი

ქ. თბილისი

სამოქალაქო უსაფრთხოების სფეროს მოხალისეთა წესდების დამტკიცების შესახებ

მუხლი 1

„სამოქალაქო უსაფრთხოების შესახებ“ საქართველოს კანონის მე-7 მუხლის მე-7 პუნქტისა და 72-ე მუხლის პირველი პუნქტის „ფ“ ქვეპუნქტის საფუძველზე, დამტკიცდეს თანდართული „სამოქალაქო უსაფრთხოების სფეროს მოხალისეთა წესდება“.

მუხლი 2

დადგენილება ამოქმედდეს გამოქვეყნებისთანავე.

პრემიერ - მინისტრი

მამუკა ბახტაძე

სამოქალაქო უსაფრთხოების სფეროს მოხალისეთა წესდება

თავი I

ზოგადი დებულებანი

მუხლი 1. რეგულირების სფერო

სამოქალაქო უსაფრთხოების სფეროს მოხალისეთა წესდება (შემდგომში – წესდება) განსაზღვრავს სამოქალაქო უსაფრთხოების სფეროში მოხალისეობითი საქმიანობის განხორციელების წესს, მოხალისეთა სტატუსს, მოხალისის რეგისტრაციის წესსა და მოხალისეთა უფლება-მოვალეობებს.

მუხლი 2. მოხალისეობითი ურთიერთობა

1. მოხალისეობითი ურთიერთობა არის მოხალისისა და საქართველოს შინაგან საქმეთა სამინისტროს მმართველობის სფეროში შემავალი სახელმწიფო საქვეუწყებო დაწესებულების – საგანგებო სიტუაციების მართვის სამსახურის (შემდგომში – სამსახური) ურთიერთობა, რომელიც ამ წესდებისა და მხარეთა თავისუფალი ნების საფუძველზე მიღწეული შეთანხმების შესაბამისად ხორციელდება.

2. სამოქალაქო უსაფრთხოების სფეროში მოხალისეობა არის საგანგებო სიტუაციის პრევენციის, მზადყოფნის, რეაგირებისა და აღდგენითი სამუშაოების ჩატარების მიზნით, ფიზიკური პირის ნებით, საკუთარი ცოდნითა და უნარით, ნებაყოფლობითა და უანგაროდ არაერთჯერადად განხორციელებული საზოგადოებისთვის სასარგებლო საქმიანობა.

3. სამოქალაქო უსაფრთხოების სფეროში მოხალისე (შემდგომში – მოხალისე) შეიძლება იყოს ქმედუნარიანი საქართველოს მოქალაქე, რომელმაც მიაღწია 18 წლის ასაკს, საკომუნიკაციო დონეზე ფლობს სახელმწიფო ენას, რომელსაც ჯანმრთელობის მდგომარეობა ხელს არ უშლის მოხალისეობითი საქმიანობის განხორციელებაში და რომელიც მზად არის, საჭიროების შემთხვევაში, თავისი ცოდნისა და უნარების გამოყენებით, ნებაყოფლობით განახორციელოს სამოქალაქო უსაფრთხოების სფეროში საზოგადოებისთვის სასარგებლო საქმიანობა.

4. თუ პირს აქვს უმუშევრის სტატუსი, მას ეს სტატუსი უნარჩუნდება მოხალისედ დარეგისტრირების შემდგომ და უფლება აქვს, ისარგებლოს ყველა იმ შეღავათითა და დახმარებით, რაც საქართველოს კანონმდებლობით უმუშევრის სტატუსის მქონე პირისათვის არის გათვალისწინებული.



5. განსაკუთრებულ შემთხვევაში, სამსახურის შუამდგომლობის საფუძველზე, დამსაქმებელთან შეთანხმებით, მოხალისეობითი საქმიანობის განხორციელების დროს, მოხალისე შეიძლება არ გამოცხადდეს სამსახურში.

6. მოხალისეობითი საქმიანობა არ შეიძლება გამოყენებულ იქნეს შრომითი ურთიერთობისთვის თავის ასარიდებლად.

7. მოხალისის მოთხოვნის შემთხვევაში, სამსახური ვალდებულია, გასცეს ცნობა, რომელიც შეიცავს ინფორმაციას მოხალისის მიერ განხორციელებული საქმიანობისა და მისი განხორციელების ხანგრძლივობის თაობაზე.

საქართველოს მთავრობის 2019 წლის 23 აგვისტოს დადგენილება №403 – ვებგვერდი, 26.08.2019წ.

მუხლი 3. საერთაშორისო თანამშრომლობა მოხალისეობით სფეროში

1. სამსახური თანამშრომლობს საერთაშორისო ორგანიზაციებთან და დებს ხელშეკრულებებს საქართველოში სამოქალაქო უსაფრთხოების სფეროში მოხალისეობის განვითარების მიზნით პროექტების განსახორციელებლად, აგრეთვე მოხალისეთა ეროვნულ სიაში დარეგისტრირებული მოხალისეებისა და მოხალისეთა გაერთიანებების საერთაშორისო ორგანიზაციებში გაწევრების ხელშეწყობის მიზნით.

2. სამსახური ხელს უწყობს მოხალისეთა ეროვნულ სიაში დარეგისტრირებულ მოხალისეთა ურთიერთობების ჩამოყალიბებასა და განვითარებას სხვა ქვეყნების მოხალისეობით ორგანიზაციებთან, ამ მიზნით ახორციელებს პროექტებს და თანამშრომლობს ამ ქვეყნების კომპეტენტურ სახელმწიფო უწყებებსა და არასამთავრობო ორგანიზაციებთან, დებს ხელშეკრულებებსა და მემორანდუმებს.

3. სამსახური საერთაშორისო თანამშრომლობის ფარგლებში ახორციელებს გრანტების მოძიებას საქართველოში მოხალისეობის განვითარებისა და მოხალისეთა ეროვნულ სიაში დარეგისტრირებული მოხალისეების მომზადების/გადამზადების მიზნით პროექტების განსახორციელებლად.

თავი II

მოხალისეთა რეგისტრაცია, მათი უფლება-მოვალეობები და მოხალისეთა მართვა

მუხლი 4. მოხალისედ რეგისტრაცია

1. პირს მოხალისის სტატუსი ენიჭება მოხალისეთა ეროვნულ სიაში რეგისტრაციის მომენტიდან.

2. მოხალისეობის მსურველი ავსებს რეგისტრაციისათვის განკუთვნილ აპლიკაციის ფორმას (დანართი №1) სამოქალაქო უსაფრთხოების სფეროს მოხალისეთა ოფიციალურ ვებგვერდზე – www.volunteers.ge-ზე, რომლის ადმინისტრირებასაც ახორციელებს სამსახურის სახანძრო-სამაშველო ძალების დეპარტამენტის შესაბამისი სტრუქტურული ერთეული.

3. მოხალისეობის მსურველმა რეგისტრაციისთვის განკუთვნილი აპლიკაცია შეიძლება შეავსოს წერილობითი ფორმით ნებისმიერ სახანძრო-სამაშველო დანაყოფში. წერილობითი ფორმით შევსების შემთხვევაში, ამ აპლიკაციის ვებგვერდზე განთავსებას უზრუნველყოფს სახანძრო-სამაშველო დანაყოფში საამისოდ განსაზღვრული პასუხისმგებელი პირი.

4. აპლიკაციისთვის განკუთვნილი კითხვარი მოიცავს ინფორმაციას პირის პერსონალური მონაცემების, განათლების, ფიზიკური შესაძლებლობებისა და უნარ-ჩვევების შესახებ, აგრეთვე სხვა დამატებით მონაცემებს.

5. სამსახურის შესაბამისი სტრუქტურული ერთეული, „სამოქალაქო უსაფრთხოების შესახებ“ საქართველოს კანონით განსაზღვრული მოთხოვნების გათვალისწინებით, მოხალისეობის მსურველი აპლიკანტის პერსონალურ მონაცემებს (სახელი, გვარი, დაბადების თარიღი, პირადი ნომერი, მოქალაქეობა), საქართველოს კანონმდებლობით დადგენილი წესით, ამოწმებს საქართველოს იუსტიციის სამინისტროს მმართველობის სფეროში მოქმედი საჯარო სამართლის იურიდიული პირის – სახელმწიფო სერვისების განვითარების სააგენტოს მონაცემთა ელექტრონულ ბაზაში.



6. აპლიკაციების დამუშავებას უზრუნველყოფს სამსახურის სახანძრო-სამაშველო ძალების დეპარტამენტის შესაბამისი სტრუქტურული ერთეული, რომელიც მოხალისეობის მსურველთათვის მართავს საინფორმაციო ხასიათის შეკრებებს.

7. მოხალისეობის მსურველმა, რომელსაც შევსებული აქვს აპლიკაცია ოფიციალურ ვებგვერდზე – www.volunteers.ge-ზე, სამსახურის მიერ ორგანიზებულ შეკრებაზე უნდა წარადგინოს საქართველოს კანონმდებლობით დადგენილი წესით გაცემული ჯანმრთელობის მდგომარეობის შესახებ ცნობა. შეკრებაზე ხდება მოხალისეობის მსურველთან გასაუბრება და აპლიკაციისათვის განკუთვნილ კითხვარში მითითებული უნარ-ჩვევების გადამოწმება. აღნიშნული ეტაპის წარმატებით გავლის შემთხვევაში, მოხალისეობის მსურველი ელექტრონული ფორმით იღებს შეტყობინებას მისი კანდიდატურის მოხალისედ შერჩევის შესახებ.

8. ამ მუხლის მე-7 პუნქტით განსაზღვრული ეტაპების წარმატებით დასრულების შემთხვევაში, მოხალისეობის მსურველი დებს მოხალისის ფიცს (დანართი №2) და ხელს აწერს მოხალისეობის შესახებ ხელშეკრულებას, რის შემდეგაც მოხალისეობის მსურველი მოხალისეთა ეროვნულ სიაში დარეგისტრირებულად ჩაითვლება.

9. მოხალისეთა ეროვნულ სიაში დარეგისტრირების შემდეგ იქმნება მოხალისის პირადი ელექტრონული პროფილი, რომელშიც შეიტანება მონაცემები პირის შესახებ და ეტაპობრივად ხდება აღნიშნული ინფორმაციის განახლება. მოხალისის პირადი ელექტრონული პროფილი განთავსდება სამოქალაქო უსაფრთხოების სფეროს მოხალისეთა ოფიციალურ ვებგვერდზე – www.volunteers.ge-ზე.

10. პირი, რომელიც არ არის დარეგისტრირებული მოხალისეთა ეროვნულ სიაში, საგანგებო სიტუაციაზე რეაგირების ან საგანგებო სიტუაციის ლიკვიდაციის ღონისძიებებში მონაწილეობის მისაღებად დაიშვება მხოლოდ განსაკუთრებულ შემთხვევაში, დამხმარე ფუნქციების შესასრულებლად.

საქართველოს მთავრობის 2019 წლის 23 აგვისტოს დადგენილება №403 – ვებგვერდი, 26.08.2019წ.

მუხლი 5. მოხალისეობითი ხელშეკრულება

1. მოხალისეობითი ხელშეკრულება იდება წერილობითი ფორმით, განსაზღვრული ვადით.
2. ხელშეკრულებით უნდა განისაზღვროს მხარეთა უფლება-მოვალეობები, აგრეთვე ხელშეკრულების შეწყვეტის საფუძვლები.

მუხლი 6. მოხალისის უფლებები და მოვალეობები

1. მოხალისეს უფლება აქვს მოხალისეობითი საქმიანობის განხორციელებისას უზრუნველყოფილი იყოს უსაფრთხო გარემოთი.
2. მოხალისეებსა და მათი ოჯახის წევრებს, თვითგანვითარების მიზნით, უფლება აქვთ, სამსახურის უფროსის მიერ განსაზღვრული წესით, ისარგებლონ სამსახურის ბალანსზე არსებული ინფრასტრუქტურით (მათ შორის, სავარჯიშო, საგანმანათლებლო), ასევე მოხალისეს უფლება აქვს, მოხალისეობრივი ფუნქციების განსახორციელებლად, საქართველოს კანონმდებლობით დადგენილი წესით, დროებით სარგებლობაში მიიღოს სამსახურის ბალანსზე არსებული აღჭურვილობა ან სხვა მოძრავი ქონება.
3. მოხალისეს, სათანადო დოკუმენტის წარდგენის შემთხვევაში, უფლება აქვს, მოითხოვოს მოხალისეობითი საქმიანობის განხორციელებისთვის გაწეული ისეთი აუცილებელი ხარჯების ანაზღაურება, როგორცაა საგანგებო სიტუაციის ადგილამდე მგზავრობის ხარჯი, აგრეთვე უფლება აქვს, მოითხოვოს საკვებითა და განთავსებით უზრუნველყოფა საგანგებო სიტუაციის სპეციფიკიდან და მასზე რეაგირების ღონისძიების ხანგრძლივობიდან გამომდინარე.
4. მოხალისეს უფლება აქვს, მოითხოვოს იმ ზიანის ანაზღაურება, რომელიც მას მოხალისეობის განხორციელებისას ჯანმრთელობის მდგომარეობის გაუარესების გამო მიაღდა, აგრეთვე მკურნალობისათვის აუცილებელი ხარჯები. აღნიშნული ზიანის ანაზღაურების პირობები განისაზღვრება საქართველოს სამოქალაქო კოდექსით.



5. მოხალისეს უფლება აქვს, ისარგებლოს ყველა იმ შეღავათითა და უპირატესობით, რომელსაც სამსახური მიანიჭებს მას სხვა სახელმწიფო უწყებებთან, მუნიციპალიტეტებთან, კერძო სამართლის იურიდიულ პირებთან, არასამთავრობო ორგანიზაციებთან ერთად მოხალისეთა წახალისების მიზნით განხორციელებული პროექტებისა და წამახალისებელი ღონისძიებების შედეგად, აგრეთვე მონაწილეობა მიიღოს სამსახურის მიერ ორგანიზებულ სიმულაციურ ვარჯიშებში, საველე სწავლებებში, საწვრთნელ შეკრებებში, სხვა ღონისძიებებსა და წამახალისებელ პროექტებში.

6. ამ მუხლით გათვალისწინებული ხარჯების ანაზღაურება და წამახალისებელი ღონისძიებებისა და პროექტების განხორციელება არ ცვლის მოხალისეობის უანგარო ხასიათს.

7. მოხალისეთა ეროვნულ სიაში დარეგისტრირებულ პირზე (მოხალისეზე) ვრცელდება „სამოქალაქო უსაფრთხოების შესახებ“ საქართველოს კანონის 62-ე მუხლით, 65-ე მუხლის მე-2 და მე-3 პუნქტებითა და 66-ე მუხლის პირველი – მე-3 პუნქტებით სამსახურის მეხანძრე-მაშველისთვის დაწესებული სოციალური დაცვის გარანტიები.

8. მოხალისე ვალდებულია:

ა) თავისი საქმიანობა განახორციელოს სამართლებრივი და ეთიკური პრინციპებისა და სამსახურთან დადებული ხელშეკრულების შესაბამისად;

ბ) სამსახურს დროულად მიაწოდოს ინფორმაცია იმ საფრთხისა თუ რისკის შესახებ, რომელიც შეიძლება სამსახურთან დადებული ხელშეკრულებით გათვალისწინებული საქმიანობის განხორციელებამ გამოიწვიოს;

გ) გაუფრთხილდეს სამსახურის ქონებას, რომელსაც იგი იყენებს თავისი საქმიანობის განხორციელებისას;

დ) აანაზღაუროს განზრახ ან უხეში გაუფრთხილებლობით მიყენებული ზიანი;

ე) სამსახურს დროულად აცნობოს ჯანმრთელობის მდგომარეობის ან სხვა ისეთი ვითარების შესახებ, რომელიც მას ხელს უშლის სამსახურთან დადებული ხელშეკრულებით ნაკისრი ვალდებულებების განხორციელებაში.

9. სამსახური ვალდებულია, მოხალისეობითი ურთიერთობის დაწყებამდე გააცნოს მოხალისეს ამ წესდებით გათვალისწინებული უფლებები და მოვალეობები.

10. ეს წესდება არ ზღუდავს მოხალისის უფლებას, ისარგებლოს იმ უფლებებითა და თავისუფლებებით, რომლებიც მას საქართველოს კანონმდებლობით აქვს მინიჭებული.

მუხლი 7. მოხალისეთა ორგანიზება და სამსახურის მიერ მხარდაჭერის ღონისძიებები

1. სამსახური ხელს უწყობს მოხალისეების ორგანიზებას ტერიტორიული, პროფესიული ან/და ასაკობრივი ნიშნით, განსაზღვრავს მოხალისეთა ჯგუფების ლიდერებს, მათი კვალიფიკაციიდან ან/და სპეციალური უნარებიდან გამომდინარე ან სხვა ნიშნით.

2. საბაზისო უნარების ჩამოყალიბების მიზნით, მოხალისეთა მომზადებას უზრუნველყოფს სამსახურის სახანძრო-სამაშველო დეპარტამენტი.

3. მოხალისეთა ეროვნულ სიაში დარეგისტრირებულ მოხალისეებს უფლება აქვთ, დააარსონ არასამეწარმეო (არაკომერციული) იურიდიული პირი. სამსახური თანამშრომლობს ამ არასამეწარმეო (არაკომერციულ) იურიდიულ პირებთან მოხალისეთა თვითორგანიზების ხელშეწყობისა და საქართველოში მოხალისეობითი საქმიანობის განვითარების მიზნით.

4. სამსახური, მოხალისეობითი საქმიანობის მხარდაჭერის მიზნით, დებს ხელშეკრულებებს/მემორანდუმებს სახელმწიფო უწყებებთან, მუნიციპალიტეტებთან, კერძო სამართლის იურიდიულ პირებთან, სიმულაციური ვარჯიშების, საველე სწავლებების, საწვრთნელი



შეკრებების, სხვა ღონისძიებებისა და წამახალისებელი პროექტების დაგეგმვისა და განხორციელების მიზნით.

მუხლი 8. მოხალისეთა შეკრება

1. საგანგებო სიტუაციის დროს მოხალისეთა შეკრება ხორციელდება ტერიტორიული პრინციპით, სპეციალურად შექმნილი მობილური აპლიკაციის, მოკლე ტექსტური შეტყობინების ან/და სატელეფონო ზარის მეშვეობით, აგრეთვე კომუნიკაციის სხვა წინასწარ შეთანხმებული საშუალებით.
2. მოხალისე მეხანძრე-მაშველთან დაკავშირება შეიძლება განხორციელდეს როგორც ამ მუხლის პირველი პუნქტით განსაზღვრული საშუალებებით, აგრეთვე კრიტიკული კომუნიკაციის სხვა საშუალებებით, ასეთის არსებობის შემთხვევაში.
3. მოხალისეთა სრული ან ნაწილობრივი შეკრების შესახებ გადაწყვეტილებას, გარდა ამ მუხლის მე-4 პუნქტით განსაზღვრული შემთხვევისა, იღებს სახანძრო-სამაშველო ძალების დეპარტამენტის დირექტორი, აგრეთვე მოხალისე მეხანძრე-მაშველთა რეაგირების ღონისძიებებში ჩაბმის შესახებ გადაწყვეტილებას იღებს სახანძრო-სამაშველო ძალების დეპარტამენტის დირექტორი.
4. საგანგებო სიტუაციის დროს მოხალისეთა სრული ან ნაწილობრივი შეკრების შესახებ გადაწყვეტილებას იღებს სამსახურის უფროსი, სახანძრო-სამაშველო ძალების დეპარტამენტის დირექტორის წარდგინებით.
5. ამ მუხლის მე-3 და მე-4 პუნქტებით გათვალისწინებულ შემთხვევებში, მოხალისეთა სრული ან ნაწილობრივი შეკრების შესახებ მიღებული გადაწყვეტილების მოხალისეთათვის შეტყობინებას უზრუნველყოფს სახანძრო-სამაშველო ძალების დეპარტამენტის შესაბამისი სტრუქტურული ერთეული.

მუხლი 9. საგანგებო სიტუაციის დროს მოხალისეთა მართვა და მათი უსაფრთხოება

1. საგანგებო სიტუაციის დროს მოხალისისთვის კონკრეტული ფუნქციის დაკისრება ხდება ტერიტორიული პრინციპის, მოხალისის კომპეტენციისა და შესაბამისი უნარ-ჩვევების გათვალისწინებით, სამსახურის სახანძრო-სამაშველო ძალების დეპარტამენტის საამისოდ უფლებამოსილი პირის მიერ.
2. მოხალისე ვალდებულია, მოხალისეობითი საქმიანობის განხორციელებისას ატაროს სამსახურის მიერ საამისოდ გადაცემული ოფიციალური ამოსაცნობი ნიშანი (ჟილეტი, ქუდი ან/და სამკლავური), რომლის ნიმუშსაც ამტკიცებს სამსახურის უფროსი.
3. სამსახური ვალდებულია, მოხალისეს საგანგებო სიტუაციაზე რეაგირების დაწყებამდე გონივრულ ვადაში, გასაგები ფორმით მიაწოდოს ინფორმაცია მის სიცოცხლესა და ჯანმრთელობასთან დაკავშირებული რისკის, მისი თავიდან აცილების ღონისძიებებისა და საფრთხის შემცველი აღჭურვილობისადმი მოპყრობის წესების შესახებ.
4. სამსახური ვალდებულია, დანერგოს მოხალისის უსაფრთხოების უზრუნველყოფი პრევენციული სისტემა, აუცილებლობის შემთხვევაში, უზრუნველყოს მოხალისე პერსონალური დამცავი აღჭურვილობით და მიიღოს ყველა სხვა გონივრული ზომა მოხალისის უსაფრთხოების უზრუნველსაყოფად და მისი სიცოცხლისა და ჯანმრთელობის დასაცავად.
5. საგანგებო სიტუაციის დროს მოხალისის მიერ უსაფრთხოების წესების დარღვევის ან მოხალისისთვის სხვაგვარად აშკარა საფრთხის შექმნის შემთხვევაში, სამსახურის სახანძრო-სამაშველო ძალების დეპარტამენტის საამისოდ უფლებამოსილი პირის მითითებით, მოხალისე ვალდებულია, შეწყვიტოს მოხალისეობითი საქმიანობა და დატოვოს ტერიტორია.
6. მითითებისადმი მოხალისის დაუმორჩილებლობის შემთხვევაში, სახანძრო-სამაშველო ძალების დეპარტამენტის საამისოდ უფლებამოსილი პირი ვალდებულია, მიიღოს ყველა გონივრული ზომა მოხალისის მიერ ტერიტორიის დასატოვებლად.

მუხლი 10. მოხალისის ჩმედებით მიყენებული ზიანის ანაზღაურება



საგანგებო სიტუაციაზე რეაგირების დროს მოხალისის ქმედებით მიყენებულ ზიანს ანაზღაურებს სახელმწიფო, გარდა იმ შემთხვევისა, როცა მოხალისემ აღნიშნული ქმედება განზრახ ან უხეში გაუფრთხილებლობით ჩაიდინა.

თავი III

მოხალისე მეხანძრე-მაშველი

მუხლი 11. მოხალისე მეხანძრე-მაშველი

1. ტერიტორიულ ერთეულში, სადაც მანძილის, რთული რელიეფის ან სხვა ობიექტური გარემოების გათვალისწინებით, სახანძრო-სამაშველო დანაყოფები სწრაფად და ეფექტიანად ვერ ახორციელებენ საგანგებო სიტუაციაზე პირველად რეაგირებას, სამსახურის უფროსი უფლებამოსილია, მოხალისეთა ეროვნულ სიაში დარეგისტრირებულ მოხალისეთაგან შექმნას მოხალისე მეხანძრე-მაშველთა ჯგუფი.
2. ამ მუხლის პირველი პუნქტით გათვალისწინებულ შემთხვევაში, მოხალისეთა ეროვნულ სიაში დარეგისტრირებულ მოხალისეს, თავისივე თანხმობით, სამსახურის უფროსის გადაწყვეტილებით, სათანადო მომზადების გავლის შემდეგ, კონკრეტულ ტერიტორიულ ერთეულში შეიძლება დაეკისროს მეხანძრე-მაშველის ფუნქციების შესრულება.
3. საგანგებო სიტუაციებზე პირველადი რეაგირებისათვის საჭირო უნარ-ჩვევების შესწავლის მიზნით, მოხალისე მეხანძრე-მაშველთა მომზადებას/გადამზადებას უზრუნველყოფს სამსახური.
4. კონკრეტულ ტერიტორიულ ერთეულში მოხალისე მეხანძრე-მაშველთა ჯგუფის საქმიანობას ხელმძღვანელობს ამ ტერიტორიულ ერთეულში მუდმივად მცხოვრები, სამსახურის საამისოდ უფლებამოსილი მოსამსახურე ან არასამხედრო ალტერნატიულ შრომით სამსახურში მყოფი პირი.
5. მოხალისე მეხანძრე-მაშველთა ჯგუფების შექმნისა და მათი საქმიანობის ორგანიზების მიზნით, სამსახური თანამშრომლობს სხვა სახელმწიფო უწყებებთან, მუნიციპალიტეტების ორგანოებთან, საჯარო და კერძო სამართლის იურიდიულ პირებთან.

მუხლი 12. მოხალისე მეხანძრე-მაშველთა აღჭურვა და ქონებაზე პასუხისმგებლობა

1. ამ წესდების მე-11 მუხლის პირველი პუნქტის შესაბამისად შექმნილ მოხალისე მეხანძრე-მაშველთა ჯგუფებს სამსახური დროებით სარგებლობაში გადასცემს სახანძრო-სამაშველო ტექნიკას, სამოქალაქო უსაფრთხოებისთვის განკუთვნილ აღჭურვილობას, მეხანძრე-მაშველის ფორმის ტანსაცმელსა და სანივთე ქონებას.
2. სამსახური უფლებამოსილია, განახორციელოს ამ მუხლის პირველი პუნქტით გათვალისწინებული სახანძრო-სამაშველო ტექნიკისა და აღჭურვილობის საჭირო საწვავ-საპოხი მასალითა და შესაბამისი ტექნიკური მომსახურებით უზრუნველყოფა.
3. სახანძრო-სამაშველო ტექნიკასა და აღჭურვილობაზე პასუხისმგებელია ამ წესდების მე-11 მუხლის მე-4 პუნქტით განსაზღვრული პირი.

საქართველოს მთავრობის 2019 წლის 23 აგვისტოს დადგენილება №403 – ვებგვერდი, 26.08.2019წ.

თავი IV

მოხალისეთა ეროვნული სიიდან ამორიცხვა

მუხლი 13. მოხალისეთა ეროვნული სიიდან ამორიცხვის საფუძველი

ფიზიკური პირის მოხალისეთა ეროვნული სიიდან ამორიცხვის საფუძველები:

- ა) მოხალისეობითი ხელშეკრულების პირობების დარღვევა;



ბ) დაკისრებული მოვალეობის არაკეთილსინდისიერად/არაჯეროვნად შესრულება;

გ) მოხალისეთა შეკრებებზე/ტრენინგებზე არასაკატიო მიზეზით სისტემატური გამოუცხადებლობა;

დ) პირადი განცხადება;

ე) სასამართლოს მიერ უგზო-უკვლოდ დაკარგულად აღიარება, გარდაცვლილად გამოცხადება ან მხარდაჭერის მიმღებად ცნობა, თუ სასამართლოს გადაწყვეტილებით სხვა რამ არ არის განსაზღვრული;

ვ) საქართველოს მოქალაქეობის შეწყვეტა;

ზ) გარდაცვალება.

მუხლი 14. მოხალისეთა ეროვნული სიიდან ამორიცხვის წესი

1. მოხალისეთა ეროვნული სიიდან ამორიცხვის შესახებ გადაწყვეტილებას, მოხალისეთა მართვაზე პასუხისმგებელი სტრუქტურული ერთეულის მიმართვის საფუძველზე, იღებს სამსახურის სახანძრო-სამაშველო ძალების დეპარტამენტის უფროსი, რაც ფორმდება შესაბამისი ინდივიდუალური ადმინისტრაციულ-სამართლებრივი აქტით.

2. მოხალისეთა მართვაზე პასუხისმგებელი სტრუქტურული ერთეულის მიმართვაში აღწერილი უნდა იყოს მოხალისეთა ეროვნული სიიდან ამორიცხვის საფუძველები.

3. მოხალისეთა ეროვნული სიიდან ამორიცხვის შესახებ შეტყობინება მოხალისეს ეცნობება ამ წესდების მე-4 მუხლის მე-7 პუნქტით დადგენილი წესით, რის შემდეგაც ოფიციალური ვებგვერდიდან – www.volunteers.ge-დან იშლება მისი პირადი პროფილი.

4. ამ წესდების მე-13 მუხლის „ა“ – „გ“ ქვეპუნქტებით განსაზღვრული საფუძველებით, მოხალისეთა ეროვნული სიიდან ამორიცხული პირი კარგავს მომდევნო ერთი წლის განმავლობაში მოხალისეობის კანდიდატად დარეგისტრირების უფლებას.



აპლიკაცია

პერსონალური ინფორმაცია:

- სახელი
- გვარი
- დაბადების თარიღი
- ფოტო სურათი 3/4
- ოჯახური მდგომარეობა
- სქესი
- პირადი ნომერი
- მართვის მოწმობა
 - ✓ დიახ (მიუთითეთ კატეგორია)
 - ✓ არა
- უცხო ენები (მიუთითეთ ცოდნის დონე)
- ხართ თუ არა დასაქმებული?
 - ✓ დიახ
 - ✓ არა

- დასაქმების სფერო
 - ✓ ადმინისტრაცია/მენეჯმენტი
 - ✓ ფინანსები/ეკონომიკა
 - ✓ ჯანდაცვა
 - ✓ იურიდიული
 - ✓ საინფორმაციო ტექნოლოგიები
 - ✓ ტექნიკური/ლოჯისტიკა
 - ✓ ხელოვნება
 - ✓ სოფლის მეურნეობა
 - ✓ თავდაცვა/უსაფრთხოება
 - ✓ მომსახურება
 - ✓ საერთაშორისო ურთიერთობები
 - ✓ ტურიზმი
 - ✓ სხვა

- განათლება
 - ✓ საბაზისო
 - ✓ საშუალო
 - ✓ უმაღლესი (უნივერსიტეტი, სპეციალობა)
 - ✓ პროფესიული (...)

საკონტაქტო ინფორმაცია:

- საცხოვრებელი ადგილი
- დაბადების ადგილი
- ტელეფონის ნომერი/ოჯახის წევრის ტელეფონის ნომერი
- ელექტრონული ფოსტა

ინტერესები, უნარ-ჩვევები:

- გსურთ თუ არა გახდეთ სპეციალიზებული მოხალისე?
 - ✓ დიახ
 - ✓ არა
- კვირის რომელ დღეებში შეგიძლიათ იყოთ მოხალისე?
 - ✓ ორშაბათი
 - ✓ სამშაბათი
 - ✓ ოთხშაბათი
 - ✓ ხუთშაბათი
 - ✓ პარასკევი
 - ✓ შაბათი
 - ✓ კვირა
- რა ტიპის აქტივობებში გსურთ მონაწილეობა?
 - ✓ წყალზე სამაშველო სამუშაოები
 - ✓ ხმელეთზე, მათ შორის, მთაზე სამაშველო სამუშაოები
 - ✓ ძებნის სამუშაოები წყალზე და ხმელეთზე, მათ შორის თოვლში
 - ✓ პრევენციული სამუშაოები
 - ✓ სტიქიის სალიკვიდაციო სამუშაოები
 - ✓ საევაკუაციო სამუშაოები
 - ✓ პირველადი სამედიცინო დახმარება
 - ✓ ჰუმანიტარული დახმარების განაწილება
 - ✓ საგანგებო სიტუაციების დროს უსაფრთხო პირობების შექმნა
 - ✓ სხვა
- ჩამოთვლილთაგან რომელ უნარ-ჩვევებს ფლობთ?
 - ✓ ცურვა
 - ✓ კლდეზე ცოცვა
 - ✓ თოვლზე თხილამურით სრიალი
 - ✓ დროში და გარემოში ორიენტაციის უნარები
 - ✓ მეწყრული პროცესებიდან ევაკუაციის უნარები

- ✓ ცხოველებთან მოპყრობის უნარები
- ✓ კომპიუტერული უნარ-ჩვევები
- ✓ ტელესაკომუნიკაციო სისტემებთან მუშაობის უნარები
- ✓ ძეზნის ღონისძიებების წარმართვა წყალზე და ხმელეთზე, მათ შორის თოვლში
- ✓ სხვა

• რა ტრენინგების გავლას ისურვებდით?

- ✓ პიველადი სამედიცინო დახმების ტრენინგი
- ✓ მთაზე სამაშველო ოპერაციების ტრენინგი
- ✓ წყალზე სამაშველო ოპერაციების ტრენინგი
- ✓ ტრენინგი დროში და გარემოში ორიენტაციის უნარებთან დაკავშირებით
- ✓ ტრენინგი ცეცხლთან გამკლავების უნარებთან დაკავშირებით
- ✓ უბედური შემთხვევის დროს რეაგირების ტრენინგი
- ✓ კლდეზე ცოცვის ტრენინგი
- ✓ დახურული სივრციდან გამოყვანის ტრენინგი
- ✓ ფსიქოლოგის ტრენინგი
- ✓ სხვა

დამატებითი ინფორმაცია:

- სიმაღლე
- წონა
- ზოგადი ფიზიკური შესაძლებლობები:
 - ✓ დამაკმაყოფილებელი
 - ✓ საშუალო
 - ✓ კარგი
- გაქვთ თუ არა ძალოვან უწყებაში მუშაობის გამოცდილება?
 - ✓ დიახ(მიუთითეთ)
 - ✓ არა
- გაქვთ თუ არა მოხალისეობის გამოცდილება?
 - ✓ დიახ (მიუთითეთ)
 - ✓ არა
- ხართ თუ არა ნასამართლელი?
 - ✓ დიახ
 - ✓ არა

- ხართ თუ არა დაზღვეული?
 - ✓ დიახ (კერძო სადაზღვევო პაკეტი, სახელმწიფო სადაზღვევო პაკეტი)
 - ✓ არა

- გაქვთ თუ არა რამე სახის ფიზიკური შეზღუდვა, რამაც შეიძლება ხელი შეგიშალოთ მოხალისეობრივ საქმიანობაში?
 - ✓ დიახ (მიუთითეთ)
 - ✓ არა

- ჩამოთვლილთაგან, გაქვთ თუ არა რომელიმე ფობია?
 - ✓ სიმაღლის შიში
 - ✓ ფრენის შიში
 - ✓ ცხოველების შიში
 - ✓ მწერების შიში
 - ✓ ფრინველების შიში
 - ✓ ქვეწარმავლების შიში
 - ✓ დახურული სივრცის შიში
 - ✓ ღია სივრცის შიში
 - ✓ გარდაცვლილი ადამიანების შიში
 - ✓ სიბნელის შიში
 - ✓ წყლის შიში
 - ✓ სხვა

ფ ი ც ი

მე (სახელი, გვარი), ვიწყებ რა მოხალისე მეხანძრე - მაშველის საქმიანობის შესრულებას, საზეიმოდ ვფიცავ:

დავიცავ ქვეყნის კონსტიტუციას და კანონებს, წესდების ყველა მოთხოვნას, დავემორჩილები ხელმძღვანელის მითითებებს;

პასუხისმგებლობითა და ენთუზიაზმით, კეთილსინდისიერად და ღირსეულად შევასრულებ ჩემზე დაკისრებულ მოვალეობებს;

არ დავიშურებ ძალას, დროსა და ენერგიას საგანგებო სიტუაციის დროს განსაცდელში ჩავარდნილი ნებისმიერი ადამიანის დასახმარებლად;

გამოვიყენებ ჩემს შესაძლებლობებს მათი სიცოცხლის, ჯანმრთელობისა და ქონების გადასარჩენად, აგრეთვე გარემოს დასაცავად;

ვფიცავ, მიღებული ფიცის ერთგული ვიქნები მოხალისეობრივი საქმიანობის განხორციელების პერიოდში.

დაე, ჩემი ქვეყნის მოქალაქეთა მადლიერება იყოს ჩემთვის უმაღლესი ჯილდო.